



## KENYATAAN MEDIA

---

### **PELAN JALINAN DIGITAL NEGARA (JENDELA) BERADA DI LANDASAN TEPAT UNTUK CAPAI SASARAN**

Pada hari ini, saya telah mempengerusikan Mesyuarat Jawatankuasa Pemandu Jalinan Digital Negara (JENDELA) untuk suku kedua Fasa 1 dan telah dimaklumkan mengenai pencapaian terkini pelaksanaan pelan JENDELA yang bermula sejak enam (6) bulan yang lalu. Berdasarkan maklumat terkini, pelaksanaan JENDELA setakat ini telah mencapai kesemua sasaran suku kedua yang ditetapkan dan berada di landasan yang tepat untuk mencapai sasaran-sasaran seterusnya.

Saya menyambut baik perkembangan semasa pelaksanaan pelan JENDELA ini yang dijangka mampu memberi tahap pengalaman perkhidmatan jalur lebar lebih berkualiti kepada rakyat di seluruh negara. Kesan pelaksanaan projek-projek telekomunikasi di bawah pelan ini sudah mula dinikmati dan dimanfaatkan oleh semua lapisan masyarakat.

Fasa 1 JENDELA sudah pun bermula dan akan berterusan sehingga akhir tahun 2022, dengan memberi fokus kepada usaha memperluaskan akses jalur lebar talian tetap berkelajuan gigabit kepada sebanyak 7.5 juta premis, memperluaskan liputan jalur lebar mudah alih 4G daripada 91.8% kepada 96.9% di kawasan berpenduduk; mempertingkatkan kelajuan jalur lebar mudah alih daripada 25Mbps kepada 35Mbps serta penamatan rangkaian 3G secara berperingkat sehingga akhir tahun 2021, bagi tujuan pemantapan rangkaian 4G dan memperkukuhkan rangkaian asas bagi 5G. Menyedari kepentingan 5G untuk perkhidmatan komunikasi lebih pantas, pelaksanaannya telah dipercepatkan setahun lebih awal daripada sasaran asal iaitu penghujung tahun 2022 kepada suku keempat tahun 2021.

JENDELA membawa aspirasi peningkatan liputan dan pengukuhan infrastruktur kesalinghubungan negara yang mampan dan inklusif. Perkembangan mengenai pencapaian semasa JENDELA akan diumumkan oleh Suruhanjaya Komunikasi dan Multimedia Malaysia (MCMC) dalam taklimat Laporan Suku Kedua JENDELA yang akan dijalankan secara maya pada 7 April 2021 (Rabu).

Laporan Suku Kedua JENDELA ini akan mengandungi pencapaian terkini usaha-usaha bagi memastikan premis-premis diliputi, pembinaan tapak baharu, naik taraf tapak sedia ada, sesi libat urus dengan kerajaan-kerajaan negeri berhubung pemakaian Garis Panduan Perancangan Infrastruktur Komunikasi (GPP-I) untuk penyediaan tanah bagi membina infrastruktur telekomunikasi di kawasan pembangunan baharu serta memantau tindakan penyelesaian segera aduan berkaitan kesalinghubungan oleh pihak penyedia perkhidmatan.

Bagi memastikan agenda kesalinghubungan internet negara terus diperkasakan, pelbagai langkah proaktif telah diambil oleh Kerajaan. Antaranya, peruntukan sebanyak RM21 bilion yang diumumkan semasa pelancaran MyDIGITAL yang akan dilaburkan dalam tempoh lima (5) tahun. Sebanyak RM3.2 bilion daripada jumlah tersebut akan dibelanjakan pada tahun 2021 melalui JENDELA di kawasan yang bukan komersial untuk memantapkan kesalinghubungan sedia ada.

Kami di Kementerian Komunikasi dan Multimedia Malaysia (KKMM) akan terus memantau perkembangan pelan ini secara menyeluruh bagi memastikan aspirasi JENDELA direalisasikan demi kesejahteraan rakyat serta terus menyeru kepada semua kerajaan negeri untuk memberi keutamaan kepada pelan ini dalam usaha melicinkan pelaksanaan projek-projek kesalinghubungan negara.

**DATO' SAIFUDDIN ABDULLAH**  
**MENTERI KOMUNIKASI DAN MULTIMEDIA**

**6 APRIL 2021**